



UPA 2014/154

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalakkersuinikkut arlaannaannulluunniit attuumassuteqanngitsunik siunnersuisoqatigiinnik pilersitsisinnaaneq pillugu UKA2014-imut nassuaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunnersuisoqatigiit aatsitassarsiornermi aningaasaliisartut sanngisuussiat aningaasaliisussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiassallutik kiisalu aatsitassarsiornermi pilersaarutit ataasiakkaat siunissaq ungasinerusoq eqqarsaatigalugu piujuartitsineq tunngavigalugu inuiaqatigiinni ineriatortitsinermik nassataqarnissaat siuarsaaqataaffigissallugu. Tamanna pillugu siunnersuisoqatigiit Naalakkersuisunut innuttaasunullu inassuteqaasiortassapput. Siunnersuisoqatigiit katitigaanerat, akissarsiaat pisinnaatitaanerilu pillugit ilutsit periarfissaasinnaasut nassuaammi ilangullugit nalilersorneqassapput.

(Inatsisartunut ilaasortat Naaja H. Nathanielsen aamma Sara Olsvig, Inuit Ataqatigiit)

Tunngavilersuut

Nunat Australiatut, Canadatut aamma Norge-tut ittut aatsitassanut tunngatillugu nunatut ingerlatsinermi pitsaasumik ileqqoqarfiusutut isigisarpagut. Canada Australialu naalakkersuinikkut arlaannaannulluunniit attuumassuteqanngitsunik siunnersuisoqatigiinnik pilersitsinikuupput aatsitassarsiornermi aningaasaliisartut aningaasaliisussarsiornermut pilersaarutaat pillugit naalakkersuisunik siunnersuisartunik. Suliaqarnermik attuumassutillit peqataaffigineqarluartumik suleqatiginerisigut aatsitassarsiornermi pilersaarutinut ataasiakkaanut tunngatillugu inuiaqatigiinnut iluaqtaasussanik periutsitigut aalajangersagalior-toqartarnissaa siunnersuisoqatigiit suleqataaffigisassavaat.

Isumaqpugut kalaallit tamatumunnga assingusumik aaqqissuussinerat ingerlatsinermi ileqqutsinnut iluaqusersuutaallunilu nunatsinni aningaasaliinissamut tatiginninnerusoqaler-neranik kinguneqassasoq.

Ilisimavarput Naamminersorlutik Oqartussat inuit paasisimasaqarluartut avataaneersut suliassap tamatuma ilaanik naammassinnittussat ullumikkut sulisussarsiarisaraat. Isumaqpugulli pitsaunerullunilu akimut ersinnerussasoq naalakkersuinikkut arlaannaannulluunniit attuumassuteqanngitsunik siunnersuisoqatigiinnik ataavartunuk pilersitsigaanni. Paasinarpooq nunat allamiut aaqqissuussaat pissutsinut atukkatsinnut inatsisitsinnullu naleqqussarnagu eqqunneqarsinnaanngimmat. Siunnersuisoqatigiit suliffissuaqarnerup, naalakkersuisutigoortuunngitsumik suliniaqatigiiffit aammalu ilisimatutut misissuiffit sinnisaanik ilaasortaqarsinnaapput.

Pisortani aningaasaqarnikkut allaffissornikkullu kingunerisassaat

Nassuaasiornermut aningaasartutissat aningaasatigut killiliussat 200.000 kr. missaasa iluanniissasut missingerneqarpoq. Siunnersuut akuerineqassappat tamanna Aatsitassanut Aqutsisoqarfimmur killiliussaatitaareersut iluanni allatut tulleriissaarinikkut aningaasalorsorneqarsinnaavoq.

Namminersorlutik inuussutissarsior tunut aningaasaqarnikkut allaffissornikkullu kingunerisassaat

Siunissaq qaninnerusoq ungasinnerusorluunniit isigalugit namminersorlutik inuussutissarsior tunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunerisassaat

Innuttaasunut aningaasaqarnikkut allaffissornikkullu kinguneqassanngilaq. Siunnersut aatsitassarsiornermut tatiginninnerulernermik kinguneqarsinnaavoq, ilaatigut suliaqarnermik attuumassutillit, taakkua ilagalugit innuttaasut naalakkersuisutigoortuunngitsumillu suliniaqatigiiffit susassaqartut, peqataatinnerisigut peqataaffigineqarluartumik oqaloqatigiissitisarnernik toqqammaveqartumik aatsitassarsiornerup tungaatigut pingaarcerusutigut anguniagassaliortarnerit inuiaqatigiinnut iluaqutaasussat qulakkeerneqartarnerisigut.